

# “እስመ ናሁ ተወከደ ከክሙ ዮም መድኅን ዘውእቲ ክርስቶስ እግዚእ ቡሩክ በሃገረ ዳዊት።”



## Har'a mandara Daawititti Fayyisaan isiniif dhalateera. Innis Kiristoos Goofticha dha.”

(Luuq. ፪፥፩-፲፪/2:1-12/)



Addaam abbooma Waaqayyoo diigee, duuti foonii fi duuti lubbuu akkasumas awwaalaatti darbatame fi abiddi bara baraa itti murtaa'ee “Abbaa koo Waaqayyoo Gooftaa, Iddoo koo Gannataa dhabee haffaa?” jechaa odoo gaddu, “በሐሙስ ዕለት ወበመንፈቃ ለዕለት እት-ወለድ እምወለተ ወለትክ ወእትቤዘወክ በመስቀልዎ ወበጥትዮ።” Guyyoota shanii fi walakkaan booda dhala dhala kee irraa dhaladhee Fannoo kootiin fi du’a kootiin si fayyisa.” Jechuudhaan isa jajjabeesseera.

Yeroon isaas yeroo gahu, bara irraa bara; ji'arraayis ji'a; torbee isaarraa torbee akkasumas, guyyaasaa irraa guyyaa odoo hin dabarsin Haadha keenya, Fageessituu dheekkamsaa, Fidduu Araaraa, Qulqulleettii Qulqullootaa Giiftii keenya Maariyaamirraa Dubrummaan; akkuma Gadaameessi ishee chaappeeffameen dubrummaa ishee odoo hin jijjiirin dhalateera.

Kunis akkamitti ta'uu danda'e? yoo jedhan; Giiftiin keenya manuma Yooseef Qulqullichaa keessa odoo jiraattu, barri sun tibba gidiraa (ዘመነ አጲባ) waan tureef, daldalaaf bahee ji'oota radi dabarsee hoggaa dhufu, michuu isaa kan ta'e Yoohaannis kan jedhamu hayyuun tokko isa (Yooseef Qulqullichaa) gaafachuuf dhufe. Yeroo gara mana Yooseef seenu

ulfa'uu Giiftii keenyaa beekke, “Durbeen tun sirraa ulfoofte moo nama biraa irraayi?” jedheen. Yooseefis “An waan akkanaa kana raawwachuu miti yaadeetu hin beeku.” Jedheen. “Maarree, seeni gaafadhu.” jedhee biraa deeme.

Yooseef gara Giiftii keenya dhaqee “ኦ ወለተ እስራኤል መትቀረጸ አክናፈ ድንግልናኪ፤ ወእምነ መት ጸነስኪ?፤ Yaa intala Israa'eel, eenyutu dubrummaa kee balleessee akka ulfoofu taasise?” Jedhee ishee gaafannaan “እም መንፈስ ቅዱስ፤ Afuura Qulqulluu irraayi.” jetteen. Dabaluudhaanis, “Maaloo, simbirrootaan amaluma isaaniirraa; biqiltuuwwanis ija (firii) akka naqatan kan taasisu Waaqayyoo kana (An sanyii dhiiraan ala akka ulfaa'u) godhuu dadhabaa?” jettee muka gogee balbala isaanii dura dhaabate lalisee akka argamu taasistee itti agarsiistee jirti.

Yeroo bayy'ee dhalli namaa waan Waaqayyoon raawwatu tokko hubachuuf ogummaa mataasaa fayyadamee bira gahuu barbaada. Waaqayyoo immoo hojiin isaa samuu namaadhaa oli. Akuuma beekkamu, dhalli namaa sanyii kormaa fi sanyii dhalaa irraa wal-hora. Giiftii keenya irratti kan raawwatame garuu, kanarraa aadda. Ulfaan dura, yeroo ulfaas, ulfaan boodaas; akkasumas dahuumsaan dura, yeroo dahuumsaas, dahuumsaan boodaas durbee dha. “ወይቤሊኒ እግዚአብሔር ዝነቲ አንቀጽ ዕዕወ ይኩን ወኢይትረጎው ወኢይባእ ቦቲ ብእሲ እስመ እግዚአብሔር አምላክ እስራኤል ቦኣ ቦቲ ወይኩን ዕዕወ።” Waaqayyoo anaan Karri kun cufamee taa'a malee hin banamu; Waaqayyoo Gooftaan Israa'eel achiin waan ol-galeef.” jedha waan ta'eef (Hiz. ፵፬፥፪/44:2, Galata Maariyaam kan guyyaa Roobii)

Ji'a sagalii fi bultii shaniin baada, guyyaan dhalachuu Gooftaa yeroo gahu, “ወጽኦ ትዕዛዝ እምነስ አውግስጦስ ቁሳር ከመ ይጸሐፍ ኩሉ ዓለም።” Yeroo sanatti uummanni Adduunyaa keessa kan jiraatan hundinuu akka galmeeffamaniif Awgixsoos mootichaa irraa ajajni ni bahe.” Yeroo kanatti “ወወድቀ ዮስፍ ውስተ ጽኑዕ መዋግደ ህሊና፤ Yooseef gar-malee



cinqame.” Jedha Kitaabni Qulqulluun. Maaliif cinqame yoo jedhan, “Yoon Ishee fuudhee deeme, dhagaan tumanii na jalaa ajjeesu. Yoon dhiisee deeme immoo “Waan goote beekkattee, mudhii jabeeffattee” akkuma jedhamutti “Hojiisaa beekkattee Dubree Maariyaam dhiisee dhufe naan jedhu” jedhee ti.

Yeroo sanatti Ergamaan Waaqayyoo abjuun itti mul’atee “ኦዮስፍ ወልደ ዳዊት ኢትዮጵያ ነሲኦታ ለማርያም ፍኅርትከ እስመ እመንጌስ ቅዱስ ወእቱ። Ulf ishee Afuura Qulqulluu irraayi waan ta’eef Kaadhimaa kee Maariyaam fudhachuuf hin sodaatin” jedhee itti himnaan, Giiftii keenya fudhatee gara Beeteeliheemitti dhaqeera. Yeroo sanatti Ayhudootni hammeenyaaf hin taa’an waan ta’eef, bishaan summaa’aa ykn ‘ማየ ዘለፋ’ haa dhugdu jedhamtee akka dhugdu taasisamteetti. Yeroo sanatti “ወአጽደለ ገዓ እምብርሃነ ፀሐይ። Fuulli Ishee ifa biiftuu caalaa ni ife.” Ifa fuula Ishee agarraan, “Mucayyo tanaan waa malee hamanneerra. Wayyoo nuuf!” jedhan.

Achumatti odoo jiran, yeroo guyyaa dahuumsaa ishee gahu, “ወወለደት ወልደ ዘበኩራ። ወአሰረቶ መንኮብያቲሁ ወጠብለለቶ በአጽርቅት ወአስከበቶ ውስተ ጎል እስመ አልቦሙ መካን ውስተ ማኅደርሙ። Ilma Angafaa (Gooftaa) ni deessee, quba isaa isa guddichaa hiitee, bakka bultii waan hin arganneef wayyaan (huccuun) martee mooraa horii keessa ciibsite.” Luuq. ፪፡፯/2:7

Samii fi lafti kan isaa ta’anii odoo jiran bakka itti dhalatu dhabe mooraa loonii keessa dhalate. Lafa bal’oo kana biqiltuun kan uffise waan uffatu dhabe huccuun marame. “በእንቲአክሙ አንደየ ርእሶ እንዘ ባዕል ውእቱ ከመ አንትሙኒ ትብሐሉ በንደተ ዘአሁ። Qabaata ta’ee odoo jiru, isin deegaa ta’uusaatiin akka badhaataniif dureesichi isiniif jecha deegaa ta’e.” ፩ffaa Qor. ፳፡፱/8:9 Waa malees miti; akka Isa fakkaannuuf, nu fakkaatee kan dhalate. Maaliif dubartii irraa qofa dhalate? Yoo jenne, innis sababa mataasaa danda’e qaba.

1. Dhaloota lamaan nubarsiisuufi dha. Uumamuu Lafaa fi samiin dura haadha malee Abbaa irraa qofa akkuma dhalate; uumamuu addunyaan booda immoo Abbaa malee Haadha irraa qofa dhalate. “ልደት ቀዳማዊ ተአውቀ በደሃራዊ ልደት። Dhalachuun isaa inni duraa Dhalachuusaa isa boodaan” akkuma jedhameen dhalachuun Isaa isa jal-qabaa hubachuu akka dandeenyuuf lammuu dhalachuudhaan nuhubachiise.
2. Raajiin dubbatame fi fakkeenya fakkeeffame raawwii akka argatuufi dha. Kunis:-

A. “ናሁ ድንግል ትጻንስ ወትወልድ ወልደ። Eгаа, Durbeen ni ulfoofti; Ilmas nideessi.” jechuun raajii Raajaa Isaayyaasiin dubbatame akka raawwatamuufis dha. Isaay. ፯፡፩-፲፬/7:1-14

B. Abbaan keenya Addaam lafa chaappeeffamte (lafa homtuu irraa hin uumamne fi hin qotamne) irraa argameera. S.Bahuu ፪፡፯/2:7 Haati keenya Heewaanis cinaacha Addaam isa cufamaa ta’e irraa argamteetti. S.Uma. ፪፡፳፩-፳፫/2:21-23 Kun lachuu immoo agarsiistota dubrummaan dhalachuun Gooftaa keenya Iyyasuus Kiristoosi ti.

3. Beeteelheemitti dhalachuun isaas ammas raajiin dubbatame fi fakkeenya fakkeeffame akka raawwatamuufi dha.

A. Raajichis “ናሁ ሰማእናሁ በእፍራታ፤ ወረከባናሁ ውስተ ሖመ ገዳም። Efraataatti isa argine; bosona keessas isa arganne.” Faar. ፩፻፵፩፡፮/131:6 jechuun fedha Waaqayyoo mijataa kan ta’e Raajaan Daawit dubbateera. Miikkiyaasis “ወአንቲኒ ምድረ ኤፍራታ ኢትቴሓቲ እምነገሥተ ይሁዳ። እስመ እምኔኪ ይወጽእ ንገሥ ዘይርአየሙ ለከዝብየ እስራኤል። Ati immoo yaa magaalaa Beetalheem kutaa Eefraataa; magaalota Yihuudaa warra gurguddoo irraa hin hanqattu, Mootiin Israa’eel eegu si keessaa ni baha.” jechuun abdi horachiiseera. Miik. ፭፡፪/5:2

B. Fakkeenya isaa immoo, mootii saba qomoo Israa’eel kan ta’e Qul. Daawit Beeteelheem keessaa filatameera. Saam. (1)፩ffaa ፲፯፡፩/16:1 Ilmaan namaa lubbuun illee, fooniin illee kan baraare Mootiin Samii fi Lafaa kan ta’e Iyyasuus Kiristoosi Beeteelheemitti dhalachuun isaatiif fakkeenya ture.

Yeroo inni dhalatus, beeyladdoonni manaas hafuura isaaniitiin isa tajaajilaniiru. Kana gochuun isaanii qorra halkanii yeroo sanii hammam akka ulfaatu (namatti qorru) agarsiisuufi dha. Yeroo sanatti Tiksitoonni illee achi turani waan ta’eef, ifa naannawa sana guutee jiru fi mil’achuu Ergamoota Waaqayyoo arguu isaaniitiin ajaa’ibsiifachaa turan. Yeroo kana Ergamaan Waaqayyoo garasaanii dhaqee “እስመ ናሁ ተወልደ ለክሙ ዮም መድኅን ዘውእቱ ክርስቶስ እግዚእ ቡሩክ በሃገረ ዳዊት። Har’a magaalaa Daawititti Fayyisaan isiniif dhalateera. Innis Eebbifamaa Kiristoos Goofticha dha.” Ergamoonni Waaqayyoo “ስብሐት ለእግዚአብሔር በሰማያት ወሰላም በምድር ስምረቱ ለሰብእ። Samiirratti Waaqayyoo galanni haa ta’u; dhala namaafis akkasuma lafarratti.” jechaa hoggaa gara samii ol-bahan arganii ‘Dhaqnee laalla.’ Jed-

hanii deemnaan, Ergamoonnis “**ሰማይ ዙፋኑ ምድር መከየደ እግሩ።** Samiin teessoo isaa laftis bakka ejjennoo komeesaa-fuu kan hin geenye” (Isaay. ፳፯፡፩/66:1) Gooftaan gooftolii hojjaa gabaabaan fi bal’ina dhiphaan murtaa’ee, huccuun maramee, mooraa keessa ciisee jiruun arganii gammadani gara samiitti ol-baanaan, abbummaa amalaa Abbaa Isaatiin fi Jireenya Amalumaa Afuura Qulqulluutii wal-qixxaatee jiru laalanii “**ስብሐት ለእግዚአብሔር በሰማይት ወሰላም በምድር ስምረቱ ለሰብእ።** Samiirratti Waaqayyoo galanni haa ta’u; dhala namaafis akkasuma lafarratti.” Jechaa galateeffatanii, mi’aayina galataa irratti mi’aayinni galataa dabalameefi, kennaarrattis kennaan dabalameef gammadaniiru.

Akkuma ilaalletti, dhalachuu Gooftaa keenyaan kan gammadan Ergamoota Waaqayyoo fi ilmaan namaa qofa miti; beeladonna, bineensonna gammadaniiru. Kun akka beekamuufis gaafa Gooftaan itti dhalatetti kallattii ‘Quwaaraa’ irraan nama lagataa adduunyaa (baahitaawii) hidda mukaa (quwaarf) qotaa odoo jiru, kurupheen takka “**ዮም ተወልደ መድኃኔ ዓለም።** Fayyisaan adduunyaa amma dhalate. **ዮም ተወልደ ቤዛ ኩሉ ዓለም።** Beenyaan lubbuu ilmaan namaa amma dhalate. **ዮም ተወልደ ከሳቱ ብርሃን።** Mil’achiisaan Ifaa amma dhalate.” Jechaa burraaqaa jirtuun arge.

Kana qofa miti, “**በእንተ ልደቱ ለክርስቶስ አድባር ኮኑ ህብስተ ሕይወት ወፅዕው ገዳምኒ ፈረዩ አስካለ በረከት ወማየ ባሕርኒ ኮነት ሐለብ ወመዓረ።** Dhalachuu Gooftaa keenyaan gaarreen soorata jireenyaa ta’ani. Mukkeen bosonaas ija eebbifamaa naqatan. Bishaan galaanaas damma fi aannan taate.” jedhamuudhaa afaan Yaareed Qulqullichaatiin akkuma dubbatameen Dhalachuu Gooftaa keenyaan raajiin ajaa’ibsiisaan mul’ateera.

Ammas, “**ሰብእ ሰገል፤** Namoota Ogummaa (Maantuseemaar, Maalkuu fi Baadiidaasfaa)” kan jedhaman mootootni Faars, dhalachuu Gooftaa keenyaa mul’achuu urjii adda taateen beekanii Sookoo (warqee), Ixaana fi Qumbii (karbee) Gannata keessaa argame fuudhanii dhufanii Gooftaa keenyaaf harka kaa’aniiru.

Sookoo (warqee), Ixaana fi Karbee kana akkamitti argachuu danda’an yoo jenne, erga abbaan keenya Addaam Gannati keessaa baheen booda, Ergamoonni Waaqayyoo Qulqulluu Mikaa’eel, Qulqulluu Gabri’eel fi Qulqulluu Ruufaa’eel Sookoo (warqee), Ixaana fi Karbee fidanii itti kennani. Innis (Addaam) Heewaaniif “**ነስአ. ዕዕከ!** Fuudhu firii kee! (ija mukaa)” jedhee itti kenne. Ishiin Seetiif (mucaa bakka Abeelitti dhalate) kennite. Akks jechaa dhaloottarraa dhaloottatti

darbaa dhufee bara Akaazitti mootii Teelgeelfeelsoor jedhamu booji’ee fuudhee kutaa qabeenyaa isaa keessa kaa’ee ture.

Abbaan isaanii (kan namoota ogummaa) Zharadashat (fi-loosoofeera dha) gayyaa tokko qarqara galaanaatti dhaqee falaasama isaa yeroo geggeessu, gabatee (saleedaa) urjii irratti durbee finna ishii hammattee jirtu arge. Waan arge sana gabateerratti (saleedaarratti) bocee lafa kaa’e. Hoggaa dulloomee du’uuf gahu ijoolleesaa waammatee “Yaa ijoollee koo, gaafa urjii gosa kanaa samiirra argitan, Mootiin Samiirraa ni dhalata waan ta’eef waan kana (Sookoo /warqee/, Ixaana fi Karbee) fuudhaa dhaqaa too harka fuudhaa! /gabbaraa!/" jedhee itti kenne du’eera.

Mootootni kunis, gorsa abbaa isaanii fudhatanii kudha lama ta’anii ka’anii karaarra diinni itti kaanaan sagalan isaanii deebi’aniiru. Isaan sadeen garuu, Sookoo (warqee), Ixaana fi Karbee fuudhanii dhufanii harka fuudhaniiru /gabbaraniiru/. Kana dhufiitiin Sookoo (warqee), Ixaana fi Qumbii (Karbee.)

Hoggaa Sookoo (warqee), Ixaana fi Qumbii (Karbee) harka kaa’uuf (gabbaruuf) dhufan san magaalaa Heeroodsi irran dhaufan waan ta’eef, “**አይቱ ሀሎ ንጉሠ አይሁድ ዘተወልደ? እስመ ርኢነ ኮከበ ዚአሁ በምሥራቅ ወመጻእነ ከመ ንስግድ ሎቱ።** Mootichi Ayihuudotaa inni dhalate eessa jira? Gulummaa (gizaat) Bahaa irraan urjiin eeramaa dhufneerra; dhaqnee sagadnaaf.” jedhanii gaafannaan Heeroodsi rifatee ogeeyyiisaa waamee “Waan kana quba qabduu? Bara keenya kanatti mootiin dhalatu jiraa?” jedhee gaafannaan “Eeyyeen. Beeteelheemitti ni dhalata “**ወአንቲኒ ቤተልሔም ምድረ ኤፍራታ ኢትቴላቲ እምነገሥተ ይሁዳ። እስመ እምኔኪ ይወጽእ ንጉሥ ዘይርእዮሙ ለሕዝብየ እስራኤል።** Ati immoo yaa mandara Beetalheem kutaa Eefraataa magaalota Yihuudaa warra gurguddoo irraa hin hanqattu; Mootiin Israa’eel eegu si keessaa ni baha.” **ሚክ ፭፡፪/Miik. 5:2** jedhamee raajii Raajotaan dubbatameera.” Jedhaniin. Innis (Heeroodsi), Beektota sadeeniin “**ተሰአሉ ጥዩቀ በእንተ ውእቱ ሕፃን ወእምከመ ረከብክምዎ ግብኩ ንቤየ ወዜንወኒ ከመ እምጻእ አነሃ ወእስግድ ሎቱ።** Waa’ee mucaa sana sirritti qoradhaa! Yoo argattaniin asumaan deebi’aa! Anis dhaqeen sagadaaf.” Jedhee geggeessen. Maat. **፪፡፩-፲፭/2:1-15**, Yaareed Qulqullichaa Baha Ifaan, **ርእዮሙ እልክቱ መሠግላን ተፈሥሐ ዓቢዮ ፍሥሐ ቦኡ ንቤሁ ወቆሙ ቅድሜሁ ወወድቁ ዲባ ምድር ወሰገዱ ሎቱ ወአርኃወ መዛግብቲሆሙ ወአብኡ ሎቱ አምኃ ወርቀ ክርቤ ወስኒኒ። ወይቤሉ አምኃ አባእነ ለክ እጣነ አቅረብኒ ለክ እምኪኢክ ለክቡር ስምክ ኡ አምላክነ በእንተ ኃጢአት**



**ሕዝብከ ከመ ትትወከፍ ስእሉቶሙ ወመሥዋዕቶሙ ዘመጸእከ ከመ ትሥረይ ሉሙ ኃጢአቶሙ።** Namoonni ogummaa sunis arganii guddaa gammadan, gara mucaa keettis seenanii iilsa dura dhaabatan. Lafattis kufanii sagadaniif. Sanduuqa isaaniis bananii sookoo (warqee), ixaana fi qumbii harka-fuudhii (simannaa) dhiyeessaniif. “Kadhannaa lammiikee aarsaa isaaniif fudhachuuf cubbuusaaniis isaaniif dhiisuuf kan dhufte yaa Gooftaa keenya, harka-fuudhii siif dhiheessine, maqaa Kee ulfaataafis ixaana Si’irraa arganne siif dhiheessine.” Baha Ifaa keey. ፬/4faa Ogeeyyiin kun dhufanii sagadaniif Sookoo Mootummaa isaaf, Ixaanicha immoo Waaqummaas-aaf Qumbii (Karbee) immoo nuuf jecha du’uu Isaaf gabbaran san, tokkoon tokkoo isaaniif raajii gara garaa laalan. Inni tokko daa’ima argee harka fuudhee sagadee bahe. Inni kuun immoo ga’eessa argee innis harka fuudhee sagadee bahe. Inni sadaffaanis maanguddoo argee harka fuudhee sagadee bahe. Dhumarrattis, inni daa’ma arge “An daa’ima argee harka fuudhee sagadeen dhufe.” jedhe. inni ga’eessa arges, “An ga’eessa argee harka fuudhee sagadeen dhufe.” jedhe. Inni maanguddoo arges, “An maanguddoo argee harka fuudhee sagadeen dhufe.” jedhe. Waan argan ajaa’ibsiifatanii irra deebi’anii gara daa’imichaa deemnaan isa daa’ima argeef ga’eessa, isa ga’eessa argeef maanguddoo fi isa maanguddoo argeef immoo daa’ima ta’ee itti mul’ate. Ammas waan argan ajaa’ibsiifatanii irra deebi’anii si’a sadaffaaf seennaan, isa daa’ima fi ga’eessa ta’ee itti mul’ateef maanguddoo, isa ga’eessa fi maanguddoo ta’ee itti mul’ateef daa’ima fi akkasumas isa maanguddoo fi daa’ima ta’ee itti mul’ateef immoo ga’eessa ta’ee itti mul’annaan ajaa’ibsiifachaa galateeffataniiru. Gala (sinqi) akka ta’uufis Giiftiin keenya biddena garbuu tolchitee itti kenniteetti. Isaanis, hamma biyyasaanii gahanitti miseensota raayyaa isaanii wajjiin nyaachaa turanii hoggaa magaalaa isaanii gahan, “Nyaata Qulqulluu kana gara magaalaa keessa hin galchinu.” jedhanii seensa magaalichaatti awwaalani galani. Warri magaalichaa keessa turan “Geessanii dhufanii?” jennaanin “Eeyyeen, geenyee dhufne.” jedhaniin. Jarrillee “Meerree ragaan keessan?” jedhanii gaafannaan,

1. Karaa waggaa lamaaf deemne guyyaa afurtamaan dhufneerra.
2. “Haati Mootichaa (Daam’imichaa) galaaf (sinqiif) biddeena nuuf kennite tajaajiltoota keenya wajjiin soorachaa dhufnee gara magaalaa hin galchinu jennee seensa magaalichaatti awwaalleerra.” jedhanii itti himnaan “Nutti agarsiisaa!” jennaan ho’ituu isaa (ho’i isaa odoo ol-hurku) ilaalanii ajaa’ibsiifataniiru.

Dhalachuun Gooftaa keenyaa jaalala ilmaan namaa gidduuti dhufeef hundee dha. Waaqayyoo fi nama, namni fi Erga-moonni akkasumas lafti fi samiin jaalala uumaniiru. Karaa biraatiin illee yoo laalle, Gooftaan keenya nuuf jecha aarsaa ta’uu kan jalqabe daa’imummaa isaatirraayi. Raajii agarsiisuu kan jalqabe illee daa’imummaa isaatirraayi. Sababuma isaatiin dhaaltuu Mootummaa isaa, faarsituu maqaa Isaa, eebbistuu ulfina Isaa taanerra. Fedhuma isaatiin kadhannaan keenya haqxuu cubbuu, human seexanaa kan dhabsiisu fi Mootummaa Waaqayyoo kan dhaalchisu ta’eera.

***Waaqayyoof galanni haa ta’u.  
Durbee Isa deesseefis Fannoo Ulfaataa Isaafis  
Galanni haa ta’u.***

**Kitaabilee Wabii**

- ✠. Kitaaba Qulqulluu hiikkaa Amaariffaa maxxansa bara 2000 B.A
- ✠. Kitaaba Qulqulluu hiikkaa Afaan Oromoo maxxansa bara 1997 B.A
- ✠. Hiika galuumsaa Wangeelota Afranii (Andimtaa Wangeel)
- ✠. Faarsaa Daawit Kan Gi’iizii maxxansa bara 2003 B.A
- ✠. Hiika galuumsaa ergaawwan Duuka bu’aa Phaawloos Qulqullicaa (Andimtaa Paawloos)

***Galata Maariyaan***